



ԵԿԵՂԵՑԱԿԱՆ ԲԵՄ. ԼՈՒՐԵՐ

Մարտի 4-ին, ուրբաթ.—Այսօր, երեկոյան ժամը 19-ին, Երևանում, հայրապետական վիլլայում, Վեհափառ Հայրապետի նախագահությամբ տեղի է ունենում Գերագույն հոգևոր խորհրդի հերթական նիստը:

Մարտի 6-ին, կիրակի.—Գ կիրակի քառասնորդական պահոց (Անառակի).

Այսօր Մայր տաճարում ս. պատարագ է մատուցում տ. Հովհաննես ավագ քին. Մարությանը: Անառակի առակի մասին քարոզ է խոսում տ. Մովսիս վրդ. Սարգսյանը:

Մարտի 8-ին, երեքշաբթի.—Այսօր, առավոտյան ժամը 11-ին, Սովետական Միությունում Արգենտինայի հանրապետության արտակարգ և լիազոր դեսպան Լեոպոլդո Բրավոն այցելում է Մայր տաճար և ապա տեսակցություն ունենում Վեհափառ Հայրապետի հետ:

Հայոց Հայրապետի և մեծահարգ հյուրի միջև տեղի է ունենում ջերմ զրույց:

Մարտի 13-ին, կիրակի.—Դ կիրակի քառասնորդական պահոց (Տնտեսի).

Այսօր Մայր տաճարում ս. պատարագ է մատուցում տ. Հակոբ քին. Հակոբյանը: «Հայր մեր»-ից առաջ «...տուր զհամար տնտեսության քո» (Ղուկ. ԺԶ 2) բնաբանով քարոզում է Ծիրակի թեմի առաջնորդ տ. Նարեկ եպս. Ծաքարյանը:

Մարտի 20-ին, կիրակի.—Ե կիրակի քառասնորդական պահոց (Դատաւորի).

Այսօր Մայր տաճարում ս. պատարագ է մատուցում տ. Մովսիս վրդ. Սարգսյանը: «Հայր մեր»-ից առաջ դատավորի առակի մասին քարոզում է տ. Անանիա վրդ. Արաբաջյանը:

Հավարտ ս. պատարագի, Վեհափառ Հայրապետի նախագահությամբ, կատարվում է մասնավոր հոգեհանգստյան պաշտոն՝ վերջերս Բուխարեստում երկրաշարժի տարերային աղետի ժամանակ ռումին և հայ զոհվածների հիշատակին:

Այս առթիվ Վեհափառ Հայրապետը, խոսք առնելով, իր, Մայր Աթոռ Ս. Էջմիածնի, հայ եկեղեցու հավատացյալ ժողովրդի եղբայրական ցավակցությունն է հայտնում տեղի ունեցած դժբախտության առիթով ռումին օրթոդոքս եկեղեցու Ն. Ս. Ժուստինիան Պատրիարքին և, ի դեմս Ռումինիայի հայոց առաջնորդ տ. Տիրայր եպիսկոպոսի՝ ռումինահայ համայնքին:

Արարողության ավարտին Հայոց Հայրապետը մասնավոր Հոգվոց է արտասանում բոլոր զոհվածների հիշատակին, հիշում նաև այս առթիվ զոհված ռումինահայոց թեմական խորհրդի երկրորդ ատենապետ Պերն Կարապետյանի անունը:

Մարտի 22-ին, երեքշաբթի.—Այսօր, երեկոյան ժամը 17-ին, Վեհարանում Հայոց Հայրապետի նախագահությամբ գումարվում է Գերագույն հոգևոր խորհրդի հերթական նիստը:

Նիստին հրավիրվել էր նաև Մայր Աթոռի ֆինանսական բաժնի վարիչ Գնունիկ Քեհայանը, որը հանգամանորեն և ձեռնհասությամբ ներկայացնում է 1976 թվականի Մայր Աթոռի բյուջեի կատարողականը և 1977 թվականի բյուջեի նախահաշիվը: Գերագույն հոգևոր խորհրդին այս առթիվ իր գոհունակությունն է արձանագրում Մայր Աթոռի ֆինանսական բաժնի վարիչ Գ. Քեհայանի խղճամիտ և աթոռանվեր աշխատանքի համար:

Մարտի 23-ին, չորեքշաբթի.—Այսօր, երեկոյան ժամը 20.30-ին, Վեհարանում միաբանության հերթական հավաքույթի ընթացքում «Աստվածաբանության և Էկումենիկ շարժման հարցերը» թեմայով գրույց է անցկացնում Մայր Աթոռի միաբան, աստվածաբանության դոկտոր Վրեժ սրկ. Ներսիսյանը, որն ուխտավորաբար գտնվում էր Մայր Աթոռում:

Զրույցի ավարտին Վեհափառ Հայրապետը իր գոհունակությունն է հայտնում Վրեժ սարկավագին՝ նրա բովանդակալից և շահեկան գրույցի համար:

Մարտի 25-ին, ուրբաթ.—Այսօր, երեկոյան ժամը 18.30-ին, հոգևոր ճեմարանի դահլիճում «Հայկական ճարտարապետության կոթողներ Ուկրաինայի հողի վրա» թեմայով բանախոսություն է կարդում ՀՍՍՀ գիտությունների ակադեմիայի հնագիտության և ազգագրության ինստիտուտի ավագ գիտաշխատող Գրիգոր Գրիգորյանը:

Դասախոսության ավարտին բանախոսը պատասխանում է ներկաներին հետաքրքրող հարցերին:

Մարտի 26-ին, շաբաթ.—Տօն է սրբոյն Գրիգորի Լուսատրչին մերոյ սոսկալի չարչարանացն և մոխն ի վիրապն.

Այսօր Մայր տաճարում, Իջման ա. սեղանի վրա, ա. պատարագ է մատուցում տ. Անանիա վրդ. Արաքաշյանը:

Մարտի 27-ին, կիրակի.—Չ կիրակի բանանորդական պահոց (Գալստեան).

Այսօր Մայր տաճարում ա. պատարագ է մատուցում տ. Հակոբ քհն. Հակոբյանը: «Հայր մեր»-ից առաջ քարոզում է Ռուսաստանի և Նոր Նախիջևանի առաջնորդական փոխանորդ տ. Տիրան վրդ. Կյուրեղյանը՝ «Քահանայք թո զգեցին զարդարություն և տուրքք թո ցնձալով ցնձացեն» (Սաղմոս) բնաբանով:

Հավարտ ա. պատարագի Վեհափառ Հայրապետի նախագահությամբ կատարվում է հոգեհանգիստ՝ ռումինահայ ծանոթ հասարակական գործիչ, թեմական խորհրդի նախկին ատենապետ Վահան Դանիելյանի հիշատակին:

Մարտի 28-ին, երկուշաբթի.—Այսօր, երեկոյան ժամը 18.30-ին, հոգևոր ճեմարանի դահլիճում Վրեժ սրկ. Ներսիսյանը դասախոսություն է կարդում «Մալաբար եկեղեցու պատմությունը» թեմայով, որին ներկա էին Մայր Աթոռի միաբանությունը և հոգևոր ճեմարանի ուսանողությունը:

